

**Uunga siunnersuut: Nalunaaquttap aalajangersarneqarnera pillugu Inatsisartut  
inatsisaat**

*Naalakkersuisut Siulittaasuannit saqqummiunneqartoq*

**pillugu**

**Inatsisinut Ataatsimiititaliap**

**siunnersuutip aappassaaneerneqarneranut**

**ILASSUTITUT ISUMALIUTISSIISUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Anders Olsen, Siumut, siulittaasoq  
Inatsisartunut ilaasortaq Aqqalu Jerimiassen, Atassut, siulittaasup tullia  
Inatsisartunut ilaasortaq Najaaraq Møller, Siumut  
Inatsisartunut ilaasortaq Harald Bianco, Inuit Ataqtigiit  
Inatsisartunut ilaasortaq A sii Chemnitz Narup, Inuit Ataqtigiit

Siunnersuut ulloq 10. november 2022-mi aappassaaniigassanngortinneqarpoq. Siunnersuutip aappassaaneerneqarnerani inersuarmi isumaqatigiinniarneq unitsinneqarpoq. Aappassaaneerinninnerup ingerlateqqinneqannginnerani siunnersuut ataatsimiititaliamit suliarineqaqqittussanngorlugu innersuunneqarpoq.

**Siunnersuutip Inatsisartunit aappassaaneerneqarnera**

Siunnersuutip peqqinnissakkut kingunerisassaasa naammattumik paasinarsisinneqarsimanninnerat siunnersuummik aappassaaneerinninnermi oqaatigineqarpoq. Tamanna tungavigalugu siunnersuutip ataatsimiititaliamit suliareqqinneqarnissaa Inatsisartunit kissaatigineqarpoq.

**Ataatsimiititaliap siunnersuummik suliarinninnera**

Ullup qaamarngata allanngortinneqarnissaanik siunnersuutip innuttaasut peqqissusiannut qanoq kinguneqarnissaa siunnersuummik aappassaaneerinninnissaq sioqqullugu isumaliutissiissusiornermut atatillugu ataatsimiititaliap Naalakkersuisunut apeqqutigaa. Tamatumunnga Naalakkersuisup akipput Naalakkersuisut tamanna pillugu immikkut misissuisimangitsut.

Ataatsimiititaliap siunnersuummik suliaqarnerminut atatillugu Nunatsinni Ilisimatusarnermik Siunnersuisoqatigiinni ilaasortaq attaveqarfigaat. Siunnersuisoqatigiinnut ilaasortaq ataatsimiititaliamut ima ilisimatitsissuteqarpoq:

- Kalaallit Nunaanni qaamasarnerata qanoq isumatsannermik malitseqarsinnaaneranut tunngasumik misissuisoqarnikuuvoq. Misissuinerup inerneraa, avannarparteriertornermi isumatsattarnerit takussaaneruleriartortartut. Aammattaaq misissuinerup takutippaa, ukiumi kaperlannerata sivilissusaa sapaatip akunneri quliunersut 14-iunersulluunniit ukiuunerani isumatsattarnermut apeqqutaanatik inernerit assigiipajaaginnartut.
- Tarnikkut nappaatilinnut immikkoortortaqarfimmiittaaq qaamaneq atorlugu isumatsannermut katsorsartinnissaq neqeroortigineqartarnikuunera tassungalu ilaatinneqarluni katsorsartinnerup ingerlanerata nalilersorneqarnera.
- Aammattaaq aasaanerani ukiuuneranilu d-vitaminit pillugit misissuisoqarnikuuvoq.
- Kiisalu UV-mik qinngornerit pillugit aamma misissuisoqarnikuulluni .

Siunnersuisoqatigiinnut ilaasortap paasissutissiissutigaa, piffissaq sivilissusooq qaangiukkaangat aasaanerani ukiuuneranilu, qaamasarnerata taartarneratalu assigiinnginnerpaaffianni, qaamasarnerata assigiinngissutaasa sunniutigisinnaasaanut tunngasut, misissuinerne ukunani eqqaaneqartuni isiginiarneqartut. Nalunaaquttap malinneqartup allangortinneratigut aasaanerani ukiuuneranilu qaamasarnerata assigiinngissusaat annertuumik sunniuteqassanganneqanngilaq, naak taamak ilimagisaqarluni misissuinerne qulaani eqqaaneqartuni misissuisoqarsimagaluartoq. Kalaallit Nunaata avannarpassumi inissisimanera peqqutaalluni, assersuutigalugu Kalaallit Nunaata avannaani ukiuunerani qaamasarnera taartarneralu peqqissutsimut sunniuteqartussaangilaq.

### **Ataatsimiititaliap inassuteqaatai**

Atuutsitsilernerne aasaanerani nalunaaquttap malikkunnaarnissaanik kissaateqarneq siullermeerinninnermi partiinit amerlanerit oqariartuutigineqarnera ataatsimiititaliap maluginiarpaa. Imaassinnaasoq nalunaaquttap Kalaallit Nunaanni malinneqartup UTC -2 -mut allangortinneratigut kingunerisassai taamaaliornikkut annikillisinneqartut.

Taama oqaaseqarluni ataatsimiititaliap isumaqatigiissup siunnersuut akuerisassanngortippaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

---

Anders Olsen  
Siulittaasoq

---

Aqqalu Jerimiassen  
Siulittaasup tullia

---

Najaaraq Møller

---

Harald Bianco

---

Asii Chemnitz Narup